

आकाशवाणी

खास-खास खबरां:-

- ब्रिक्स मुखे दे बदेश मंत्रिं दी दंऊ दिनें दी बैठक अज्ज नमीं दिल्ली च शुरु होआ रदी ऐ।
- असम सरकार ओंटी 26 मई गी राज्य विधान सभा च समान नागरिक कोड यानी UCC बिल पेश करोग।
- केन्द्र सरकार नै सितम्बर 2026 जां अगले हुकमै तोड़ी खंडू दे निर्यात पर तुरत प्रभाव कन्ने पाबंदी लाई दिती ऐ।
- पच्छिम बंगाल सरकार नै आलू- गंडे- फलें- सब्जियें- अन्नदानें ते होरनें चीजें गी दुए राज्यें च लेई जाने पर लग्गी दी पाबंदी गी खत्म करी दिता ऐ।
- उत्तर प्रदेश च कल बरखा- तूफान ते शमानी बिजली पौने दिएं घटनाएं च 60 लोकें दी मौत होई गई ऐ।
- केन्द्र सरकार नै सी.बी.आई दे निदेशक परवीण सूद हुंदा कार्जकाल इक बरे लेई बधाई दिता ऐ।
- आई.पी.एल च कल Royal Challengers बैंगलूरू नै कोलकाता नाइट राइडर्स गी 6 विकेटें कन्ने रहाया- विराट कोहली नै केंई रिकार्ड अपने नांस कीते।

<><><><><><>

BRICS Meet

ब्रिक्स मुखे दे बदेश मंत्रिं दी दंऊ दिनें दी बैठक अज्ज नमीं दिल्ली च शुरु होग ते एहदी प्रधानता बदेश मंत्री डाक्टर एस.जयशंकर हुंदे आसेया कीती जाहग। ब्रिक्स मुखे दे बदेश मंत्री ते सदस्य ते भ्याल मुखे थमां डेलीगेशनें दे प्रमुख बी इस बैठका च हिस्सा लैगंन। ओह प्रधानमंत्री नरेन्द्र मोदी हुंदे नै बी मलाटी करगंन।

<><><><><><>

Trump –China

अमरीका दे राष्ट्रति डोनाल्ट ट्रम्प दंडु दिनें दी शिखर वार्ता लेई चीन दी राजधानी च न ते एल्ले उन्दी चीनी राष्ट्रपति शी जिंगपिन हुंदे'ने गल्लबात चलै करदी ऐ। ट्रम्प होर कल चिरे संजा चीन दी राजधानी बीजिंग पुज्जे हे ते अज्ज बड्डलै बीजिंग दे “ग्रेट हॉल ऑफ द पीपल” च जिनपिंग होरें उन्दा शानदार सोआगत कीता- जेहदे मगरा दौने नेताएं बश्कार शिखर वार्ता शुरु होई। खीरी जानकारी थहोने तगर गल्लबात चलै करदी ही। सूत्रें मुजब दौने नेताएं बश्कार जिनें प्रमुख विषयें ते मुद्दें पर चर्चा होआ करदी ऐ उन्दे च ईरान युद्ध- बपार ते टैरिफ ते ताइवान ते आर्टिफीशल इंटेलीजेंस संकट शामल न। एहदे इलावा ट्रम्प हुंदा केई बड्डे कारोबारियें कन्नै बी मलाटी लाने दा कार्जक्रम ऐ। टेस्ला दे एलन मस्क- एनवीडिया दे जेनसन हुआंग ते एपल दे टिम कुक जनेए बड्डे बपारी-कारोबारी बी बीजिंग पुज्जे दे न।

<><><><><><>

Israel PM-UAE

इजरायल दे प्रधानमंत्री बेजांमिन नेतन्याहू होरें ईरान कन्नै जारी लड़ाई दे चलदे संयुक्त अरब अमीरात दा गुप्त दौरा कीता ते राष्ट्रपति शेख मोहम्मद बिन ज़ायद अल नाहयान हुंदे कन्नै गल्लबात कीती। नेतन्याहू हुंदे दफ्तरें इस गल्लै दी तस्दीक करदे होई ब्यान जारी कीता ऐ ते आखेआ ऐ कि इस मलाटी कन्नै इजरायल ते UAE दे सरबंधें च ऐतिहासक प्रगति होई ऐ। अजे कि टकोहदे तौरा पर केहड़ी-केहड़ी गल्ल ते केह प्रगति होई ऐ- एहदा जिक्र इस ब्यान च नई कीता गेआ। तौआई संयुक्त अरब अमीरात नै इजरायली प्रधानमंत्री हुंदी इस यात्रा कन्नै जुडी दिए खबरें गी सिरे सवां खारज करी दिता ऐ। UAE दे विदेश मंत्रालय नै इक सोशल मीडिया पोस्ट च आखेआ ऐ कि एह खबर झूठ ऐ ते कोई गुप्त बैठक दौने नेताएं बश्कार नई होई ऐ। इनें खबरें पर ईरान नै त्रिक्खी प्रतिक्रिया दिंदे होई आखेआ ऐ- जेहड़ा बी मुख्य ईरान खलाफ इजरायल दी मदद करोग- उसी एहदा खामयाज़ा भुगतना पौग।

<><><><><><>

PM -Abu Dhabi

प्रधानमंत्री नरेन्द्र मोदी कल शुक्रवार थमां लेइयै औंदी 20 मई तगर 5 मुल्खें -संयुक्त अरब अमीरात- नीदरलैंड- स्वीडन- नारवे ते इटली दे अपने दौरै तैहत कल अबु-धाबी पुज्जडन। बदेश मंत्रालय च पच्छमी सीगे दे सचिव सिबी जार्ज होरें दस्सेआ ऐ जे 5 मुल्खें दे अपने दौरै दे पैहले पड़ांs यानि संयुक्त अरब अमीरात च श्री मोदी होर उत्थु दे राष्ट्रपति शेख मोहम्मद बिन जायद अल नाहयान हुंदे'नै मलाटी करगंन। इस दरान दवै नेता दपक्खी सरबंधें खासकरियै ऊर्जा सैहयोग सनें आपसी हितें आहले इलाकाई ते आलमी सतह दे मुद्दें पर बी बचार -बटांदरा करडन।

<><><><><><>

Assam- UCC

असम सरकार औंदी 26 मई गी राज्य विधानसभा च Uniform Civil Code यानि UCC बिल पेश करोग। असम दे मुखमंत्री दे तौर पर अपने दुए कार्यकाल दी पैहली कैबिनेट बैठक दी प्रधानता करने परैन्त मीडिया गी सम्बोधित करदे होई मुखमंत्री हिंमता बिसवा सरमा होरें एह ऐलान कीता। उनें दस्सेया जे औंदी 21 थमां 26 मई तोड़ी राज्य विधानसभा दा इक खास इजलास लाया जाह- जिस दरान नमें चुने गेदे विधायकें गी सगंध चुकाई जाहग। इस गैह दे कन्नै उत्तराखंड ते गुजरात दे बाद असम साढ़े देसै दा त्रीया ऐसा राज्य बनी जाहग- जिन्ने राज्य विधानसभा च UCC बारे बिल पेश कीता ऐ।

<><><><><><>

Centre Sugar

केन्द्र सरकार नै सितम्बर 2026 जां अगले हुकमै तोड़ी खंडू दे निर्यात पर तुरत प्रभाव कन्नै रोक लाई दिती ऐ।

उद्योग ते बपार मंत्रालय दे मतैहत विदेशी बपार महानिदेशालय आसेआ जारी इक अधिसूचना मुजब एह बंदश यूरोपी संघ ते अमरीका गी CXL ते TRQ कोटा- पेश गी प्राधिकरण योजना ते होरनें देशें दी खाद्य सुरक्षा जरूरतें गी पूरा करने लेई निर्यात कीते जाने आहले खंडू पर लागू नैई होग। निर्यात प्रक्रिया च पैहले सवां भेजने लेई त्यार खेपें पर एह हुकम लागू नैई होग।

<><><><><><>

WB -Restrictions Lifted

पच्छिम बंगाल सरकारै आलू- गंडें- फलें- सब्जियें- अन्नदानें ते होरनें जरूरी चीजें दी इक दुए राज्य च आओ-जाई पर लगगी दी हर चाली दी रोक गी हटाई दिता ऐ। एह बंदशां तृणमूल कांग्रेस सरकार आसेआ लाइयां गेदियां हियां ते इंदे कारण करसानें- टकोहदा करियै आलू दी पैदावार करने आहलें करसानें गी बड़ा मता नुकसान झल्लना पौंदा हा- कीजे ओ अपनी पैदावार गी अपनी मर्जी कन्नै पच्छिम बंगाल थमां बाहर नैई हे बेची सकदे ते उनें'गी उन्दे झाड़ दे बदले उस्सै भाह कन्नै संदोख करना पौंदा हा- जेहड़ा उनें'गी राज्य दे अंदर थहोई सकदा हा। तौंआई राज्य च सरकार नै टीचर भर्थी- नगर निकाएं भर्थी ते सहकारी सेवा भर्थी घोटालें कन्नै जुड़े दे मामलें गी CBI गी सोंपने दा निर्देश बी जारी कीता ऐ। राज्य सरकार नै उनें सब्भनें लोकें दिएं सेवाएं गी बी खत्म करी दिता ऐ- जिनें'गी TMC पन्शनी होने दे बाद बी परतियै नौकरी पर लाए दा हा।

<><><><><><>

UP Rain- Deaths

उत्तर प्रदेश च बरखा- धूड़ भरोचे अंधी-झकखड़ ते शमानी बिजली पौने दियें घटनाए च 60 लोकें दी मौत होई गई ऐ। मुखमंत्रि होरें घटनाएं दा संज्ञान लैंदे होई अधिकारियें गी निर्देश दिते न जे प्रभावत लोकें गी हर मुमकिन मदाद पुजाई जा। सब्भनें शा मता जानी नुकसान बढोही जिले च होआ ऐ जित्थे 15एं जनें दी जान जाने दी जानकारी हासल होई ऐ। घायल इक दर्जन कोला मते लोकें गी अस्पतालें च दाखल बी कराया गेदा ऐ। मौतें दा कारण अंधी-झकखड़ कारण बूहटें ते कंधे बगैरा दा डिग्गना ते शमानी बिजली पौना दस्सेआ गया ऐ।

उत्तर प्रदेश दे केंई सारे इलाकें च कल मौसम चानचक्क बदली गोआ हा ते बरखा- अंधी-झक्खड़ ते बिजली पौने दिएं घटनाएं दे चलदे इन्ना नुक्सान होआ। एहदे बाद मते सारे इलाकें च बिजली-पानी दी सप्लाई ते गड़डियें दी आओ-जाई बी प्रभावत होई ऐ।

<><><><><><>

IPL

IPL च कल विराट कोहली नै रायपुर च कोलकाता नाइट राइडर्स कन्नै खेड्ढे गेदे इक मैच च अपनी टीम गी 6 विकटें दी जित दोआने दे कन्नो-कन्नी केंई रिकार्ड अपने नां कीते। कोहली नै 60 गेंदे च नाबाद 105 रन्ज बनाए- जिंदे च 11 चौके ते 3 छक्के शामिल हे। IPL च एह उन्दा 9मां शतक ऐ जेहड़ा टूर्नामेंट दे इतिहास च कुसै बी खडारी आसेआ सब्भनें शा मता ऐ। अपनी पारी दे दौरान विराट कोहली नै टी-20 क्रिकेट च 14 जहार रन्ज बी पूरे कीते- एह उपलब्धि हासल करने आहले ओह पैहले भारती ते सब्भनें शा तेज खडारी बी बनी गेन। उंनें इस मामले च क्रिस गेल दा रिकार्ड त्रोड़ेया ऐ। एहदे इलावा कोहली नै इस IPL सीजन च 400 रन्ज दा आंकड़ा बी पार करी लैता ऐ। पैहले बल्लेबाजी करदे होई कोलकाता नाइट राइडर्स नै 20एं ओवरें च 4 विकटें दे नुक्सान पर 192 रन्ज बनाए हे- जेहदे परते च रॉयल चैलेजर्स बेंगलुरु नै 19 ओवर ते इक गेंद खेड्डियै 4 विकटें दे नुक्सान पर एह लक्ष हासल करी लैता ऐ। बरखा कारण एह मैच कोई सवा घंटा चिरे शुरु होआ ते बेंगलुरु नै टास जितियै पैहले गेंदबाजी करने दा फैसला लैता। इस सीजन च अपनी 8मीं जित दे कन्नै गै बेंगलुरु दी टीम अंक तालिका च सब्भनें शा उप्पर पुज्जी गेई ऐ ते प्ले आफ च थाहर बनाने दे भलेया कोल बी। अज्ज संजा साइडे 7 बजे धर्मशाला च पंजाब किंग्स ते मुम्बई इंडियन्स बश्कार मकाबला होग।

<><><><><><>

CBI Dir-Extension

केन्द्र सरकार नै केन्द्री जांच ब्यूरो CBI दे निदेशक प्रवीण सूद हुंदा कार्जकाल इक बरे लेई होर अगड़े बधाई दिता ऐ।

कार्मिक मामले ते सिखलाइए सरबंधी मैहकमे आसेया जारी अधिकारिक हुकमै मुजब मंत्रीमंडल दी नियुक्तिये सरबंधी कमेटी नै कल यानि 13 मई गी सूद होरेंगी इक बरे दा सेवा विस्तार दिता ऐ। प्रवीण सूद हुंदा मजूदा कार्जकाल इस म्हीने दी 24 तरीक गी मुक्का करदा हा। इस फैसले दे कन्ने गै प्रवीण सूद CBI निदेशक दे रुपे च अपना कार्यकाल जारी रक्खगंन।

<><><><><><>